

55

LÆTA OMINA  
VIRO NOBILISSIMO,  
AMPLISS. JURIS CONSULTISS.  
DOMINO

# THEOPHIL DANIELI



CIVIT. THORVN. SENIORI  
CONSVLI, ÆRARI PUBL. PRÆFECTO PRIMAR.  
ET SCHOLARCHÆ GRAVISSIMO,  
UT ET  
JVDICII TERRESTRIS NOBILITATIS CVL-  
MENSIS ELECTO ASSESSORI,

DIEM ONOMASTICVM

d. 3. NOV. AN. M. DCC. XXVI.

FELICITER CELEBRANTI

IN FORMA PANEGYRICI

GRATVLABVNDI OFFERVNT

AC SVBMITIVNT

GYMN. THORVN. CIVES.



THORVNII

Impressit Ioh. Nicolai NOBIL, SENAT. & GYMN, Typograph.

druck. abr. p. 50.

8.



Rgo Helicon iterum longæ post tædia noctis  
Lætior evigilat, fugit omnis inertia somni.  
Quamvis durat adhuc mentesque obnubilat aer  
Crassior, & Morpheus varias imitantia formas  
Somnia dispensat, simulacrae ludicra fingit  
Attamen evigilat, sublato vertice cernit,  
*Auroram pridem croceum liquisse cubile*  
Titoni, ac toto radios dispergere cælo.  
Conscius ore pudor manat, moerentque sorores  
Thespiades tantum blando indulsisse sopori.  
Ergo alacres se proripiunt: hæc stragula picta  
Ordinat, illa oculos fluvialibus abluit undis.  
Ast aliæ ambrosios nectunt de more capillos,  
Myrraque inficiunt: spirant opobalsama odorem,  
Qua se illæ vertunt: aliæ sub tegmine fulgent  
Coccineo, & viridi duplicatur forma smaragdo.  
Interea, dum se exornant, æternaque magnis  
Thura adolent superis, ut fata immania flectant,  
Ut pacem exorent, ac diæ Pacis alumna  
Copia inexhausto mittat sua munera cornu:  
Fama volat cælo medio, sonitumque repente  
Dat clangore tubæ. pictæ tacuere volucres,  
Et fremitum posuere feræ, sine murmure fluxit  
Vistula, nec Zephyri suetos movere susurros.  
Mirantur quid Fama ferat, num bella minetur,  
Principis aut obitum magnæque excidia gentis,  
Aut pestem, aut alias divorum nunciet iras.  
Illa prope adsistens: Divæ, quare otia vobis  
sunt adeo cordi? cur moesta silentia servant  
Natæ Mnemosynes? non carmine personat æther,  
Non silvæ voces referunt vallesque reductæ?  
Olim dulce fuit uituras condere chartas,  
Cantare heros exaltaque secula mundi.  
Olim grande sonans potuit raptare cothurnus

Attonitas

Attontas mentes, regesque animosa referre  
Melpomene, & socco risus miscere Thalia.  
Vestam aliæ dixere, & magnæ jura Parentis:  
Unde horis statis exæstuet Amphitrite;  
Sidera quid moveant; lumen cur sæpius orbi  
In solitum veriat, qua Parrhasis ursa refulget;  
Cur turbet pelagum nautis infestus Orion;  
Mobile circumeat terras Hyperionis astrum,  
An vero immotum sedeat regnetque quietum;  
Saturnus quotnam famulos numeretue benignus  
Juppiter; ut Phœbi discum Cyllenius ales  
Fussa recepturus subeat rutilansque Dione.  
Tum quæ norma boni, vel qui sit limes honesti,  
Quæ mentis medicina foret, quæ linea recti,  
Quam superare nefas, temere confundere passim  
Vitam omnem evertit, vitiisque immittit habendas.  
Hæc canere, his animi nervos intendere, pulcrum  
Nempe fuit famamque dedit. nunc ordine verso  
Conticuit Pimplea, artesque exosa Minervæ  
Barbiton abiecit. clamabunt sidera, vocem  
Attollent maria. attollet Marpesia cautes.  
Quin agite Aonides, ad gaudia sueta redite:  
Gaudia festa dies, aura meliore renascens,  
PHILOTHEO sacrata dabit: date vota secunda  
PHILOTHEO: hoc pietas iubet, hoc edicit Apollo.  
Non tulit has voces Clio, sed protinus infit:  
Fama quid insultas, Musisque silentia longa  
Obiicis, & sacros aditus tua buccina turbat?  
Tu regum turres adeas & mœnia comple,  
Tu populi ignavi vacuas allabere ad aures:  
Dic quid agat tellus septem subiecta Trioni,  
Persida quid vexet, quæ classes Baltica stagna  
Sollicitent tonsis, vel quid formidet Iberus,  
Sperent Francigenæ, quare Trinacria luctu

Squaleat, infando casu perculta Panormi.  
Facta infecta refer, visa & non visa recense.  
At nos fata premunt misera, intercludere vocem  
Quæ valeant, lætosque negent diffundere vultus.  
Nos sævo erectum deflemus funere DAPHNIN  
DAPHNIN cuius amor nobis nullo excidet ævo,  
Cuius bonos nullo non perpetuabitur ævo.  
Non unus dolor est, pulsus deflemus ALEXIN,  
Sedibus extorrem patriis, qua grande Gedanum  
Surgit, & humectant agros vada salsa Trionum.  
Hic decus omne fuit nobis & gloria genti  
Pieriae, hic coluit colles umbrosaque Tempe,  
Quo se cunque tulit, cœlesti rore madebat  
Pinguis ager, lætæ fruges, & pondere rami  
Pomorum incurvi. Quem postquam fatatulere,  
Non molles violæ spirant, amaranthus odorem  
Ex uit, & spinis surgit paliurns acutis.  
Quid mirum, si vasta jacet Parnassia rupes:  
Scrupea tota via est, Cyprios saliunca molesta  
Interemit flores, imis radicibus herba  
Uritur, humor abest, ac deficit Hippocrene.  
Sic illa, hæc iterum regerit Titania virgo:  
Daphnis vester amor fuerat, dileximus & nos  
Daphnin, pro meritis Daphnin tollemus ad astra.  
At postquam excelsum limen miratur Olympi,  
Despicit & terras humiles, ac sidera pulsat,  
Nunc alias DAPHNIS, alias consurget ALEXIS  
PHILOTHEUS sit vester amor, pro flore amaranti  
Pæstanisque rosis albescet suave ligustrum.  
Quidni jam cedant lacrumæ, post syrmata plectrum  
Grande sonet, laudesque inter funeralia surgant?  
Ille etiam doctas gustavit Hyantidos undas,  
Induit ille animo secli melioris amorem:  
Non sibi, verum aliis depontam pectore ab imo

Virtus.

Virtutem exercet, patriæque effundit in usus:  
Nobilibus factis urbi prodesse jacenti,  
Communique bono se impendere gloria summa est:  
Quid dicam, quam temperiem pia lumina servent:  
Non suffusæ etenim cernuntur sanguine venæ,  
Nor tetra horrescit facies, vel lividus usque  
Pallor in ore sedet tempestatemque minatur.  
Plebeiae hoc agitant animæ, quæ verbera poscunt,  
Quam primum ex ardore stimulis, et felle redundant  
Viscera, suppliciis sibi met solatia quærunt.  
At sapiens tranquillus agit, quod magna potestas  
Sæpe negat, viresque ex haurit multa minando.  
Huic, quando tendit sensim ad fastigia rerum,  
Frons antiqua manet, gravitate modestia semper  
Permista elucet, similem se præstat ubique  
Summis & mediis, nec fines transilit usquam.  
Quid mirum, hoc viso attonitum si mobile vulgus  
Compescit voces, arrestisque auribus adstat?  
Semper ei adsistit victrix opulentia linguae,  
Canicies animi præbet sua pondera dictis.  
Si quos summa viri vis ac reverentia fregit,  
Hos blando affatu recreat relevatque cadentes.  
Fulmina non etenim mittit, sed mellea ab ore  
Verba fluunt, suavi veluti testudine cantus  
Edidit, ac silvas cum cautibus impulit Orpheus.  
Videre hoc PATRES, pretiumque dedere labori;  
Si tamen est pretium, majora imponere collo  
Pondera, & in vacuas exhausta æraria censu  
Ferre manus, lapsisque Urbis succurrere rebus.  
Videre hoc EQVITES, terræ Culmensis aviti  
Indigenæ, ac nuper secum sellæ esse curulis  
Magni & Judicii socium jussere fidelem.  
Scilicet hoc virtus agitat, sibi sufficit illa  
Sola quidem; fasces, statuas, & grande tropæum

Erigit

Erigit ipsa sibi; sortis secura futuræ  
Jugiter a supera temnit tranquillior arce,  
Quod stupet indoctum vulgus, precioque petessit,  
Monstrari digito, & vano clarescere plauju.  
Virtutem tamen ambit bonos, vestigat, & amplis  
Sarmatiæ invitat PROCERUM succedere testis.  
Quid moror? Elbingam tendo, atque effabor amicis,  
Quod stadium ingressus, quo sit sublatus honore  
PHILOTHEUS, quid speret adhuc, quid Numinat tendat  
Addere virtuti. Linguis animisque favete  
Pierides, date dulce melos, date carmina digna  
MÆCENATE pio, magno sint CONSULE digna.  
Audiit hæc Helicon, tanta virtute SCHOLARCHÆ  
Lætior, ad doctos fontes abidere Camœnæ.  
Illos luteolis ornarat Flora ligustris,  
Idaliisque rosis, & suave micanti hyacintho.  
Spirabant dulci violæ ferrugine pictæ;  
Quicquid odoratus longe blanditur Hydaspes,  
Quicquid thuriferis Arabum progerminat horti  
Hoc omnis turgebat humus, quia nectare pennas  
Imbuerat Zephyrus, vallesque hoc rore madebant.  
Nec Floram auctum nus, vel tristis bruma moratur;  
Hoc Natura parens Musis gratatur honore.  
Hinc Clio redimita comas, qua saepè magistra  
Abdita PHILOTHEUS seclorum evolverat acta,  
Ludentes graviter sic est affata sorores:  
Ecce dies optatus adest, quo visere nostri  
Limina PATRONI liceat, vocesque canoras  
Edere, jam fasces lubeat legesque subire.  
Sed turpe est manibus vacuis & munere cassis  
Ferre gradum: ut nostris non aurum evolvitur antris,  
Nec gemmas Permessis alit baccasque Erythræas,  
Non adeo pauper fuerit Parnassia rupes,  
Inque vicem doni succendent candida vota.

Tu Plutum exora, verbisque impelle Thalia  
Savaribus, adducat secum tellure reclusa  
Thesaurum, profundat opes, illstret amicas  
Vasibus auratis ædes, surgantque columnæ  
Marmore Amyclæo, niteant laquearia gemmis.  
Publica si fuerint æraria plena metallo  
Solari, augebit si vestigalia censu  
Cynthia, florebit Pindus meliusque valebit,  
Squalidus ingeniis habitusque & turpis egestas  
Abscedet, largæque fluent Permessidos undæ.  
Calliope atque Erato, vobis Epidauria tellus  
Scilicet est nota, & pulcram novistis Hygeian.  
Hæc per Taygetum frondosaque Mænala flores  
Vitalesque herbas carpat; qua diditur amplius  
Carpatus, Hercynii saltus, Hyblæaque Tempe,  
Currat, radices atque auxiliaria morbis  
Gramina conquirat, calathisque apportet in aureis.  
Omnia PHILOTHEO domino famulentur, ut ætas  
Semper sit viridis, rugas ut tarda senectus  
Adspergat, seroque abrumpant fila sorores.  
Cælestem URANIE sphæram compinge, coruscet  
Phœbus ubi astrorum ductor, Phœbique Diana  
Æmula, & inclusus famuletur spiritus astris.  
Iura polus servet, duodeno signifer annum  
Sidere percurrat; medium disternet orbem  
Libra pares horas faciens; Capricornus inertem  
Designans hyemem longa cum nocte reducat.  
His illæ dictis abeunt, & iussa faceſſunt.  
Interea Clio carmen maiore cothurno  
Pangit, ut hoc caneret vario modulamine vocis,  
Organaque aptaret digitis Polyhymnia doctis,  
Argutis distincta tubis; tum vecte trabali  
Murmura molitur, suavi magna atria complet  
Concentu; pulsata chelys & tibia acutum

Personæ

Personat, & plectrum tractatur Arione dignum.  
Reddite Pierides plausus, a vertice Pindi  
Accipite exemplum, susceptaque solvite vota,  
Optime MAECENAS, nostris sol addite terris,  
Quo Themis & Pallas gaudent heroe togato!  
Suscipe quos Helicon laetus TIBI præstat honores,  
Et patere ut resonent Dircæo flumine tecta.  
Astrorum veluti depresso pondere vasto  
Alcides subit Atlantem, & rutilantia torquet  
Sidera sustentatque humeris; hinc omnia cernit,  
Hinc ortus obitusque videt, circumflua Thule  
Oceano quid agat, Nabathæaque regna minentur:  
Sic TIBI mens invicta malis flabilisque perennet  
Vis animi, sive ancipites TIBI CVRIA curas  
Conduplicat, cruciantque urbana Ceraunia pectus;  
Nomina seu solvenda sient, dubitetque exhaustus  
FISCVS, qui liceat pressos onerare Qvirites;  
Sive Heliconiadas sit opus firmare labantes.  
Usque Tuus maneas, adversaque fronte serena  
Irride, majorque exi per jurgia famæ.  
Annue præcelfa mundi Regnator ab arce:  
Nubila dispelle, ac mites promittere soles  
Incipe. fac NOSTRO Pyliis iteretur ut annis  
Festa dies; Phœnix veluti consurgat Eous;  
HEBE illi ambrosiam, roburque ministret HYGEIA;  
COPIA ab æterno glomeret sua munera cornu;  
Largiter HELIADES fudent electra sorores;  
GLORIA de cedro statuat Libanitide molem.  
Sic magnum TE Numen amet, defendat, & ornet;  
Splendidius proatum ceris & marmore nomen  
Fata parent; pateant semper TU A tecta Camænis,  
Quarum victuris nomen super æthera chartis  
Scandet, & ignava ducet de morte triumphum.

os (O) os

ms. 113044

n. fol. 3 art. 55